

Idioma aleutiano

L'**aleutiano** ye una luenga d'o filo esquimoaleutiano, charrata en o estreito de Bering, entre Rusia y lo estado norteamericano d'Alaska.

Contenius

Filiación

Estructura d'a luenga

Grafía

Morfosintaxi

Historia d'a luenga

Aspectos socioculturals

Situación cheografica

Situación social

Variación diatopica (Dialectolochía)

Literatura

Vinclos externos

Filiación

L'aleutiano ye clasificato como a sola luenga d'un grupo, l'**aleutiano**, que forma chunto a las variedatz esquimals o filo d'as luengas esquimoaleutianas.

Estructura d'a luenga

Grafía

O sistema d'escritura ye l'alfabeto latín.

En o sieglo XIX, l'alfabeto que s'emplegó ta escribir a luenga yera una adaptación de l'alfabeto cirilico feita per Sant Inocencio d'Alaska.

Morfosintaxi

L'aleutiano no ye una luenga ergativa.

L'orden sintactico d'a oración ye de subchecto + obchecto + verbo, como en as altras luengas d'o filo.

Aleutiano


Unangan


Atras

Aleuta

denominacions:

Parlato en:

 Islas Aleutianas y Islas Pribilof (Alaska)

 Islas d'o Comandant (Krai de Kamchatka)

Parladors:

Entre 150 y 500

Filiación

Esquimoaleutiana

chenetica:

Aleutiana

Aleutiano

Estatus oficial

Regulato por:

Sin regular

Codigos

ISO 639-2

ale

SIL

ale (http://www.ethnologue.com/show_language.asp?code=ale)



Extensión de l'aleutiano

Historia d'a luenga

Aspectos socioculturals

Situación cheografica

A luenga se localiza en a faixa d'o estreito de Bering, principalment en as islas Aleutianas, as islas Pribilof y parte d'a península d'Alaska a l'ueste d'a baía de Stepovak. Istos territorios perteneixen a Alaska, estado d'os Estados Unidos. A luenga ye charrata tamién en as islas Commander u Komandor, politicament rusas.

Situación social

Una zifra imprecisa d'entre 150 y 500 personas la charran, más que más en a variedat oriental. A gran mayoría ye bilingüe, sobretot en anglés.

A luenga corre periglo d'amortar-se en iste sieglo, si bien o Centro d'as Luengas Nativas d'Alaska (<http://www.uaaf.edu/anlc/>) ha feito un poder ta promover-la.

Variación diatopica (Dialectolochía)

A luenga conta con dos variedatz prencipals: l'aleutiano occidental u atkano, charrato en l'isla d'Atkan y en as islas Komandor u Commander; y l'aleutiano oriental, charrato en as Aleutianas orientals, as Pribilof y la península d'Alaska.

En l'aleutiano occidental se troban os dialectos d'Attu, de l'isla de Bering y de l'isla de Copper (u Medniy). En l'aleutiano oriental se troban os dialectos d'Unalaska, de Belkofski, d'Akutan, d'as islas Pribilof, de Kashega y de Nikolski.

Literatura

En 1824, o mosen d'a llesia ortodoxa rusa, Ioann Veniaminov, qui más tarde esdevendría San Inocent Veniaminov, plegó en Unalaska y n'estudió la variedat aleutiana. Rancando de l'alfabeto cirilico, creyó una ortografía ta la luenga, tradució lo Evanchelio de Sant Mateu y belaltras obras relichiosas a l'aleutiano y publicó una gramatica de l'aleutiano oriental en 1846. As obras relichiosas se traducieron con l'aduya de dos amigos de Veniaminov, os dos charradors nativos d'aleutiano: o capezero de Tigalda, Ivan Pan'kov, y lo mosen d'Atka, Iakov Netsvetov, que escribiría un diccionario de l'aleutiano atkano. Dimpués que s'imprentasen as obras de Veniaminov, bellas feguras relichiosas s'intresoron per estudiar y rechistrar l'aleutiano con a fin d'aduyar a los pedricadors ortodoxos rusos en o suyo quefer de misioners.

En o decenio de 1930, dos aleutianos nativos estioron os autors d'obras que se consideran grans tringos entadebant en o empleo de l'aleutiano como luenga literaria. Afinogen K. Ermeloff escribiba lo relato d'un naufrachio en o suyo propio idioma, mientras que Ardelion G. Ermeloff anotaba en ixos anyos un diario personal. Devez, o lingüista Melville Jacobs replegó bells textos nuevos de Sergei Gollei, un charrador d'aleutiano atkano que yera hespitalizato.

Vinclos externos

- **(es)** Pachina d'a organización Proel sobre a luenga aleutiana (<http://www.proel.org/mundo/aleutino.htm>)
 - **(en)** Pachina d'o Prochecto Gutenberg con o diccionario aleutiano-anglés de Charles A. Lee (<http://www.ibiblio.org/gutenberg/1/0/0/4/10040/10040.txt>)
-

Obtenito de "https://an.wikipedia.org/w/index.php?title=Idioma_aleutiano&oldid=1475640"

Zaguera edición d'ista pachina o 8 mar 2013 a las 13:24.

O texto ye disponible baixo a Licencia Creative Commons Atribución/Compartir-Igual; talment sigan d'aplicación clausulas adicionales. Mire-se os termins d'uso ta conoixer más detalles.